

Morning Dogri (NSD) National News Bulletin 08-08-2024

आकाशवाणी

- राष्ट्रपति द्रौपदी मुर्मू होरें आखेआ ऐ जे शिक्षा समाजी परिवर्तन ते राष्ट्र निर्माण दा इक बड्डा जरिया ऐ। न्यूजीलैंड दी दऊं दिनें दी सरकारी यात्रा पर ओह अज्ज बडलै राजधानी वेलिंग्टन पुज्जियां।
- भारतीय रिजर्व बैंक दे गवर्नर शक्तिकांत दास होर अज्ज द्विमासक मुद्रा नीति दी घोषणा करगन।
- बंगलादेश दी अंतरिम सरकार दा शपथ ग्रहण समारोह अज्ज संजा आयोजित होग।
- ओलंपिक्स च भारत दे जैवलिन थ्रो दे मजूदा चैंपियन नीरज चोपड़ा अपना खताब बचाने ते इक बारी परतियै इतिहास रचने लेई मदान च उतरगन।
- मर्दे दी हॉकी च कैह दे तगमे लेई अज्ज संजा भारत ते स्पेन बश्कार मकाबला होग।
- मेजबान नेपाल गी हराइयै CAVA महिला बालीवाल नेशनल्स लीग दा खताब भारत नै दूई बारी अपने नां करी लैता ऐ।

<><><><><><>

President

राष्ट्रपति द्रौपदी मुर्मू होरें आखेआ जे शिक्षा, समाजी परिवर्तन ते राष्ट्र निर्माण दा माध्यम ऐ। वेलिंग्टन दे टकीना वेलिंग्टन कन्वेंशन सेंटर च न्यूजीलैंड अंतराष्ट्रीय शिक्षा सम्मेलन गी संबोधत करदे होई राष्ट्रपति होरें आखेआ जे भारत सरकार नै देश च शिक्षा दी गुणवत्ता च सुधार करने लेई केई गैह पुटिटयां न। न्यूजीलैंड दे अपने दऊं दिनें दे राजकीय दौरे लेई राष्ट्रपति होर न्यूजीलैंड पुज्जी गेइयां न, जित्थें न्यूजीलैंड दे गवर्नर जनरल डेम सिंडी किरो होरें उंदा गौरमेंट हाउस च शानदार सुआगत कीता। राष्ट्रपति होरें गी रॉयल गार्ड ऑफ ऑनर कन्ने सम्मानत कीता।

समारोह सुआगत च पारम्परिक माओरी संस्कृति दा प्रदर्शन कीता गेआ। गवर्नर जनरल होरें राष्ट्रपति होरें गी Hongi Practice लेई साद्दा दित्ता जित्थें उनें Haka Performance दा बी नंद लैता।

<><><><><><>

RBI

भारतीय रिजर्व बैंक आरबीआई दे गवर्नर शक्तिकांत दास होर अज्ज दऊं दऊं महीने परैंत जारी कीती जाने आली मैट्रिक नीति दी घोषणा करगन। आरबीआई दी मौद्रिक नीति सरबंधी कमेटी एमपीसी दी त्रै दिनें दी द्विमासक नीति बैठक 6 अगस्त थमां मुंबई च चलै करदी ऐ। बैंक नै फरवरी 2023 दे बाद होने आली पिछली 8 नीति समीक्षाएं च रेपो रेट च कोई बदलाव नेई कीता ऐ।

<><><><><><>

Lok Sabha

लोकसभा नै माली बिल 2024 गी संशोधनें कन्नै मंजूरी देई दित्ती ऐ। इस बिल कन्नै माली ब'रे 2024–25 लेई केन्द्र सरकार आस्सेआ माली प्रस्तावें गी लागू कीता जाग। बिल दे पारित होने कन्नै गै बजट दी कारवाइयां हुन पूरी होई गेदियां न। लोकसभा च इस बिल बारे चर्चा दा परता दिंदे होई वित्तमंत्री निर्मला सीतारमण होरें इस गल्लै पर जोर भरेआ जे कर सरबंधी रवैया कर कनूनें ते प्रक्रियाएं गी होर मता सखल्ला बनाने ते मुख्य च तरक्की ते रोजगार गी सक्षम बनाने पर केन्द्रित ऐ। मैडिकल ते लाईफ इंशोरेंस उप्पर जीएसटी गी हटाने दी विपक्ष दी मंग उप्पर सीतारमण होरें आखेआ जे मैडिकल बीमा पर 18 फीसद जीएसटी हटाने दे मुद्दे दा फैसला जीएसटी काउंसल च कीता जाई सकदा ऐ। वित्त मंत्री होरें अगगे आखेआ जे पिछले महीने दी 31 तरीक तोड़ी माली ब'रे 2024–25 लेई रिकार्ड गिनतरी च 7 करोड़ 28 लख टैक्स रिटर्न दायर कीते गे, जेहड़ा पिछले ब'रे दे मकाबले 7.5 फीसद मता ऐ।

<><><><><><>

Bangladesh

बंगलादेश च नोबेल पुरस्कार कन्नै सम्मनत प्रो. मोहम्मद यूनुस हुंदी अगुवाई आली अंतरिम सरकार अज्ज संजा शपथ लैग। सेना प्रमुख जनरल वाकेर—उज—जमान होरें कल मीडिया संबोधन च एह गल्ल आक्खी। जनरल वाकेर होरें मेद बुज्झी ऐ जे त्रऊं—चऊं दिनें दे अंदर मुल्खै च स्थिति सामान्य होई जाग। उनें आखेआ जे पिछले किश दिनें थमां कीते गेदे अपराधें च शामिल होने आलें गी नेई बख्खोआ जाग ते उंदे खलाफ कनूनी कारवाई कीती जाग।

<><><><><><>

ISRO

भारतीय अंतरिक्ष अनुसंधान संगठन इसरो इस स्वतंत्रता दिवस दा जश्न अंतरिक्ष च पृथ्वी अवलोकन उपग्रह गी कक्षा च स्थापत करियै मनाग। उपग्रह गी लांच करने लेई स्मार्ट सैटलाइट लांच व्हीकल दा इस्तेमाल कीता जाग, जेहड़ा 15 अगस्त गी बडलै 9 बज्जियै 17 मिंटे पर आंध्रप्रदेश च श्रीहरि कोटा थमां लांच कीता जाग।

<><><><><><>

ECI

भारत दे मुख् चूनां आयुक्त राजीव कुमार ते चूनां कमीशनर ज्ञानेश कुमार ते डॉ. सुखबीर सिंह संधु होर अज्ज जम्मू कश्मीर दे दौरे पर आवा'रदे न। इस दरान ओह जम्मू कश्मीर च विधानसभा चूनां सरबंधी तैआरिएं दा जायजा लैंगन। जम्मू कश्मीर च पिछले 6 ब'रें थमां कोई बी चुनी दी सरकार नेई ऐ। चूनां आयोग दी टीम अज्ज बडलै 10 बजे श्रीनगर पुज्जोग ते बक्ख—बक्ख सियासी पार्टिएं दे नुमायंदें कन्नै गल्लबात करोग। जम्मू कश्मीर दे मुख् चूनां अधिकारी पी.के.पोले होरें दस्सेआ जे आयोग प्रदेश ते राश्ट्रीय पंजीकृत बक्ख—बक्ख सियासी पार्टिएं दे नुमायंदे कन्नै मलाटी करोग। एहदे मगरा उंदा डिप्टी कमीशनरें ते एसएसपीए कन्नै मलाटी लाने दा कार्यक्रम ऐ। मगरा एह दल चूनां अधिकारी, प्रदेश पुलिस, नोडल अफसर ते केन्द्रीय नीम फौजी बलें दे अफसरें कन्नै मलाटी करियै चूनां सरबंधी तैआरिएं दा जायजा लैग। आयोग मुख् सचिव अटल चुल्लू ते पुलिस महानिदेशक आर.आर. स्वैन हुंदे कन्नै रातीं 9 बजे मलाटी करोग।

जेहूदे मगरा एह दल जम्मू लेई रवाना होग। जम्मू च बी कनून नाफिज करोआने सरबंघी बक्ख-बक्ख अजेंसिएं कन्नै मलाटी करोग। इत्थें एह दस्सना लाजमी ऐ जे सुप्रीम कोर्ट नै पिछले ब'रे हिदायत कीती ही जे जम्मू कश्मीर च विधानसभा चुनां इस ब'रे 30 सितम्बर थमां पैहले-पैहले करोआए जान।

<><><><><><>

Paris Olympic

पैरिस ओलंपिक्स च मजूदा ओलंपिक्स ते विश्व चैंपियन नेज्जा सुट्टने आले खडारी नीरज चोपड़ा अपने खिताब दी रक्षा करने लेई फाइनल च उतरगंन। ओह इक बारी फही इतिहास रची सकदे न। तोआई मर्दे दी हॉकी टीम अज्ज ओलंपिक्स च कैह दे तगमे लेई स्पेन कन्नै खेडोग। उआं कुश्ती च भारत दे इक्कले मर्द पलोआन अमन सहरावत अज्ज दपैहरी मगरा मर्दे दी 57 किलोग्राम भार वर्ग फ्रीस्टाइल स्पर्धा च हिस्सा लेंगन। इआं गै महिला पलोआन अंशु बी 57 किलोग्राम भार वर्ग फ्रीस्टाइल स्पर्धा च मैदान च उतरगंन। पैरिस ओलंपिक्स च कल भारत लेई मंदे भागें आली घटना च महिला पलोआन विनेश फोगाट होरें गी 50 किलोग्राम वर्ग च उंदा भार किश ग्राम मता होने कारण फ्रीस्टाइल फाइनल मकाबले लेई अयोग्य घोषत करी दित्ता गेआ। विनेश होरें फाइनल मकाबले च अयोग्य ठैहराए जाने आले फैसले खलाफ खेल पंचाट न्यायलय सीएएस च अपील दर्ज कीती ऐ। उनें अपने आस्तै संयुक्त आलंपिक्स च चांदी दे तगमे दी मंग कीती ऐ। तोआई भारत दियां भारतोलन खडारी एस.मीराबाई चानू महिलाएं दी 49 किलोग्राम फाइनल मकाबले च पैरिस ओलंपिक्स च चौथी थाहर पर रेइयां। स्पर्धा दे दऊं चरणें दे समापन मगरा चानू 199 किलोग्राम दा भार चुक्की सकियां। 2020 दे एशियाई चैंपियनशिप च उनें बेहतरीन प्रदर्शन करदे होई 205 किलोग्राम भारत चुक्केआ हा। भारतीय खडारी अविनाश साबले होरें गी मर्दे दी 5 ज्हार मीटर दी स्टीपलचेज द्रौड़ च 11मीं थाहर च संदोख करना पेआ।

<><><><><><>

Vinesh Phogat

विनेश फोगाट नै पैरिस ओलंपिक्स च कुश्ती दे फाइनल मकाबले च भार मता होने कारण कल अयोग्य घोषत कीते जाने मगरा कुश्ती थमां सन्यास लेने दी घोषणा कीती। उनें इक सोशल मीडिया पोस्ट च एह जानकारी दित्ती।

विनेश फोगाट होरें गी सुन्ने दे तगमे दे 50 किलोग्राम वर्ग च खेड्डे जाने आले फाइनल मकाबले शा पैहले तकरीबन 100 ग्राम भार मता होने कारण अयोग्य घोषित करी दित्ता गेआ।

<><><><><><>

CAVA

काठमांडू दे दशरथ स्टेडियम च आयोजित CAVA महिला बालीवाल नेशनल्स लीग दे फाइनल च मेजबान नेपाल गी 3–2 कन्नै हराइयै भारत नै खताब अपने नां करी लैता ऐ। CAVA महिला बालीवाल नेशनल्स लीग दा खताब भारत ने दूर्इ बारी जित्तेआ ऐ। लीग स्टेज च नेपाल कोला इक बारी हारने दे बावजूद भारत नै शानदार प्रदर्शन करदे होई खताब अपने नां करने च कामयाबी हासल कीती। प्रतियोगिता च भारत गी सुन्ने दा, नेपाल गी चांदी दा ते ईरान गी कैह् दा तगमा थहोआ।

<><><><><><>

Tunisia

तोनेसिया दे राष्ट्रपति कैम सैयद होरें प्रधानमंत्री अहमद ध्वानी होरें गी बर्खास्त करी दित्ता ऐ ते उंदी थाहर पर सामाजिक मामले दे मंत्री कामिल मछौरी होरें गी प्रधानमंत्री नियुक्त कीता ऐ। राष्ट्रपति होरें कल रातीं इक ब्यानै च एह जानकारी दित्ती। एह बर्खास्तगी देसै दे केई हिस्से च पानी ते बिजली कटौती लेई बार बार होआ'रदे विरोध प्रदर्शन कारण कीती गेई ऐ। ध्वानी होरें गी पिछले ब'रे अगस्त च तोनेसिया दे प्रधानमंत्री दे रूपे च नामित कीता गेआ हा। बर्खास्त होने थमां किश घैंटे पैहले ध्वानी होरें इक वीडियो सनेए च आखेआ जे सरकार नै वैश्विक चुनौतिएं दे बावजूद केई क्षेत्रें च तरक्की कीती ऐ जिदं च देसै दी खाद्य ते ऊर्जा जरूरतें गी सुरक्षित करना शामिल ऐ।

<><><><><><>